



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL  
**PANELI ZGJEDHOR PËR ANKESA DHE PARASHTRESA**  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.337/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kujtim Pasuli kryesues, Ramush Bardiqi dhe Bujar Muzaqi anëtarë, duke vendosur përkitazi me ankesën e Subjektit Politik Lëvizja Vetëvendosje (LVV), me seli në Prishtinë, paraqitur kundër Subjektit Politik Aleanca për Ardhmërinë e Kosovës (AAK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 05.02.2025, merr këtë:

**V E N D I M**

- I. Pranohet e bazuar ankesa e subjektit politik Lëvizja Vetëvendosje (LVV), me seli në Prishtinë, Anr.337/2025 e datës 03.02.2025.
- II. Subjektit Politik Aleanca për Ardhmërinë e Kosovës (AAK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjorbë në lartësi prej 2,000.00 (dymijë) euro.
- III. Detyrohet Subjektit Politik Aleanca për Ardhmërinë e Kosovës (AAK), me seli në Prishtinë, që gjorbën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

**A r s y e t i m**

Me datë 03.02.2025 PZAP-i, ka pranuar një ankesë nga subjekti politik Lëvizja Vetëvendosje (LVV), me seli në Prishtinë, me të cilën pretendon se më 02 shkurt 2025, Qendra e Lëvizjes Vetëvendosje në Shtime, kanë identifikuar flamurin e AAK-së, të vendosur në oborrin e SHFMU "Emin Duraku", me çka konsiderojnë se me këtë veprim subjekti politik AAK, ka shkelur nenin 34, paragrafi 1, nën paragrafi 1.2, të Ligjit Nr.08/L-288 për Zgjedhjet e Përgjithshme në Republikën e Kosovës –LZP.

Si provë parashtruesi i ankesës ka bashkangjitur Fotografii që dëshmojnë vendosjen e flamurit të AAK-së, në kundërshtim me LZP-së.

Më datë 04.02.2025, PZAP-i, e njoftoi Subjektin Politik, Aleanca për Ardhmërinë e Kosovës (AAK), me seli në Prishtinë, për ankesën e paraqitur kundër tyre.

Në përgjigjen në ankesë, Koalicioni AAK, Nisma dhe Lista Ideal, nëpërmjet kësaj përgjigjeje ndaj ankesës, kundërshton në tërësi pretendimet e subjektit politik Lëvizja Vetëvendosje, duke i konsideruar ato të pabazuara.

Në vazhdim të përgjigjes kanë sqaruar se flamuri i bashkangjitur si provë në ankesën e LVV-së, është vendosur përgjatë kohës ku ky subjekt ka mbajtur tubim politik aty, dhe ka shërbyer si ORIENTIM për pjesëmarrësit se në cilin vend po mbahet tubimi, dhe menjëherë pas përfundimit të tubimit, e njëjta është larguar nga ai vend. Më tutje kanë theksuar se vendosja e flamurit në shkollën fillore në qytetin e Shtimes ka pasur një qëllim operacional dhe nuk ka pasur asnjë qëllim të ndikimit politik të drejtpërdrejtë apo të promovimit të një subjekti politik në hapësira publike, duke mos i shkelur parimet e ligjit për zgjedhjet. Në vazhdim theksojnë se vendosja e flamurit, në këtë rast ka shërbyer si sinjalizim i përkohshëm dhe praktik për pjesëmarrësit e tubimit, i cili është hequr menjëherë pas përfundimit të tubimit dhe nuk ka mbetur aty si një element që do të mund të ndikonte në hapësirën publike për një periudhë të gjatë.

Përgjigjes në ankesë ka bashkangjitur fotografit në shkollën e lartcekur ku ka qenë i vendosur flamuri i subjektit politik AAK.

Paneli, pasi që shqyrtoj të gjitha shkresat e lëndës gjeti se:

#### **Ankesa është e bazuar**

Paneli, nga fotografitë e ofruara si provë nga parashtruesi i ankesës, të cilat gjenden në shkresat e lëndës, në mënyrë të padyshimtë ka konstatuar se subjekti politik AAK, ka përdorur institucionin publik, konkretisht oborrin e SHFMU "Emin Duraku" në Shtime, ku ka vendosur flamurin e AAK-së, pra me këtë veprim subjekti politik Aleanca për Ardhmërinë e Kosovës AAK, ka bërë shkelje të nenit 34, paragrafi 1, nenparagrafi 1.2 të Ligjit Nr.08/L-228 për Zgjedhjet e Përgjithshme në Republikën e Kosovës LZP, konkretisht neni 34, paragrafi 1 nën paragrafi 1.2 i LZP-së parasheh: "1. *Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: 1.2 vendosja e njoftimeve, pllakateve dhe posterëve, ose përndryshe, vendosja e emrave të tyre ose e sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugët publike, në shenjat publike të trafikut, brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombëtare, ose brenda ose në hapësirat private pa leje e pronarëve ose shfrytëzuesve.*

Neni 120 paragrafi 1 nën paragrafi 1.3 të LZP-së, thekson se në rast se PZAP, përcakton se ka ndodhur shkelje e të këtij ligji ose e rregullave të KQZ-së, mundet të vendosë një gjobë ndaj një subjekti politik, në vlerë deri në pesëdhjetëmijë (50,000.00) Euro.

Përveç kësaj një veprim i tillë sanksionohet edhe me nenin 24 paragrafi 6 nën paragrafi 6.1 Rregullës Nr.01/2024, ku përcaktohet se "subjekti politik që është përfutues i fondeve për financimin e subjekteve politike përmes Buxhetit të Republikës së Kosovës dënohet me gjobë deri në njëzetmijë (20, 000.00)euro.

Paneli, me rastin e vendosjes i vlerësoi edhe të gjitha pretendimet e subjektit politik e Koalicioni AAK, Nisma dhe Lista Ideal, në kuadër të pretendimeve të theksuara në përgjigje në ankesë, mirëpo të njëjtët ishin të pabazuara, sepse subjekti politik Koalicioni AAK, Nisma dhe Lista IDEAL nuk kanë bashkangjitur asnjë provë për ta dëshmuar se me datë 02.02.2025 kanë pasur tubim elektorale në SHFMU “Emin Duraku” në Shtime, dhe si të tilla nuk ishin me ndikim për një vendim ndryshe, për çka Paneli, vlerësoi dhe vendosi si në dispozitiv të këtij vendimi.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm, subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik AAK, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje në Kosovë që do të thotë se i njëjti është i njoftuar me rregullat zgjedhore.

Nga arsyet e theksuara me lart, e në kuptim të nenit 34 paragrafi 1 nën paragrafi 1.2, nenit 118 paragrafi 1, neni 120 paragraf 1 nën paragrafi 1.3, të LZP-së, nenit 10 paragrafi 1, nën paragrafi 1.2 të Rregullores Nr.01/2024 për Procedurat e Parashtrimit dhe Vendosjes së Ankesave vendosi si në dispozitiv të këtij vendimi.

Paneli Zgjedhor për Ankesa dhe Parashtrës  
Anr.337/2025 më datën 05.02.2025

Kryesuese e Panelit  
Kujtim Pasuli



**KËSHILLA JURIDIKE:** Kundër këtij vendimi nuk lejohet ankesa konform nenit 118 paragrafi. 4 të LZP-së.